

आकाशवाणी जयपुर-अजमेर
प्रादेशिक समाचार
दिनांक 17.05.2025 समय: 18.48 बजे

- केन्द्र सरकार पाकिस्तान री शह ऊं भारत मांय फैलाया जा रह्या आतंकवाद रे खिलाफ भारत रो रुख बतावण सारू खास साझेदार देशां मांय बहुदलीय प्रतिनिधिमंडल भेजेलां
- मुख्यमंत्री भजन लाल शर्मा प्रधानमंत्री नरेन्द्र मोदी रा बीकानेर दौरा री तैयारियां रो आज बीकानेर मांय जायजो लीनों
- संयुक्त राष्ट्र संघ री रपट रे मुजब भारत ई साल सब ऊं तेजी ऊं बधती माली व्यवस्था बण्यो रेहवेलों
- प्रदेश मांय जोरदार गर्मी-बीकानेर, चूरू अर श्रीगंगानगर समेत कई ठौड़ां लू रा हालातं

000

भारत रा आतंकवाद ऊं लड़बा रा मजबूत अर अडिग संकल्प री जाणकारी दुनिया ने देवण सारू केन्द्र सरकार सात बहुदलीय प्रतिनिधिमण्डल न्यारा-न्यारा देशां मांय भेज रही हैं अ दल पाकिस्तान री शह ऊं भारत मांय फैलाया जा रह्या आतंकवाद रे खिलाफ भारत रो नज़रियो बतावेलों अ प्रतिनिधिमंडल ई महीना रा आखिर मांय संयुक्त राष्ट्र सुरक्षा परिषद रा सदस्यां समेत खास साझेदार देशां रो दौरा करेलों आं मांय न्यारी-न्यारी पार्टियां रा सांसद, खास सियासी व्यक्तित्व अर नामी राजनयिक शामिल व्हेलें अ दल दुनिया ने भारत री आतंकवाद रे खिलाफ करड़ी नीति री जाणकारी देवेलों आ सात प्रतिनिधि मण्डलें री अगुवाई भारतीय जनता पार्टी रा रविशंकर प्रसाद अर बैजयंत पांडा, कांग्रेस रा शशि थरूर, जनता दल यूनाइटेड रा संजय कुमार झा, द्रविड़ मुनेत्र कषगम री कनिमोझी करुणानिधि, राष्ट्रवादी कांग्रेस पार्टी री सुप्रिया सुले अर शिव सेना रा श्रीकांत एकनाथ शिंदे करेलों संसदीय कार्य मंत्री किरन रिजिजू कह्यो है के बहुदलीय प्रतिनिधि मण्डल भारत रो साझो संदेश ले र चालेलों वे कह्यो के अ दल सियासी मतभेदां ऊं न्यारा देश रा एका री ताकतवर निशाणी हैं

000

प्रधानमंत्री नरेन्द्र मोदी रो 22 मई ने बीकानेर रो दौरा करण रो कार्यक्रम हैं वे देशनोक ऊं 103 अमृत भारत रेलवे टेशनां रो वर्चुअल तरीका ऊं उद्घाटन करेलों रेलवे बोर्ड मांय सूचना अर प्रचार विभाग रा कार्यकारी निदेशक दिलीप कुमार आकाशवाणी समाचार सागे बातचीत करता थकां बतायो के आं टेशनां ने सिटी सेंटर री भांत ओजू विकसित करी ज्या हैं अ टेशन क्षेत्रीय संस्कृति अर विरासत रो दरसाव करे हैं

.....

मुख्यमंत्री भजन लाल शर्मा आज बीकानेर मांय प्रधानमंत्री नरेन्द्र मोदी रा 22 मई ने प्रस्तावित दौरा री तैयारियां रो जायजो लीनों ई दौरान वां सागे केन्द्रीय मंत्री अर्जुनराम मेघवाल अर जिला रा प्रभारी मंत्री गजेन्द्र सिंह खींवसर ई मौजूद हों श्री शर्मा भाजपा रा कार्यकर्तावां ने प्रधानमंत्री री सभा सारू जरूरी तैयारियां टेम सर पूरी करण बाबत् कह्यो मुख्यमंत्री देशनोक रा करणी माता मिन्दर मांय दर्शन कीना, ज्यीं पाछे वे तिरंगा यात्रा मांय सिरकत कीनीं जैसलमेर रा रामदेवरा मांय ई आज तिरंगा यात्रा निकाळी ज्यीं पाली मांय फौज रा मान मांय काल तिरंगा यात्रा निकाळी जावेलों

000

रिटायर्ड मेजर जनरल अनुज माथुर सशस्त्र बलों ने 'ऑपरेशन सिंदूर' की कामयाबी सारू बधाई देता था कहे हैं के भारत रा सशस्त्र बल पाकिस्तान ने करड़ो जवाब दीनो हैं आकाशवाणी सागे खास बातचीत मांय वे कह्यो के सगळों ने राष्ट्र प्रथम की भावना सागे काम करणो चाहिये

.....

आप ऑपरेशन सिंदूर की कामयाबी रा बारा मांय आज रात 8 बज्यां आकाशवाणी जयपुर-अजमेर ऊं रिटायर्ड मेजर जनरल अनुज माथुर सागे बातचीत रो खास कार्यक्रम सुण सको हों

000

राष्ट्रीय स्वयंसेवक संघ रा सरसंघचालक डॉ. मोहन भागवत कह्यो हैं के भारत किण ई ऊं दुश्मनी नी राखे हैं पण गर कोई हिमाकत करेला तो वां ने सबक सिखावण मांय पाछे नी हटेलां डॉक्टर भागवत आज जयपुर रा रविनाथ आश्रम मांय राखी ज्या कार्यक्रम मांय बोल रह्या हां भागवत कह्यो के भारत दुनिया मांय शांति अर भाई-चारा बधावण सारू काम कर रह्यो हैं

000

भारत की माली व्यवस्था रे चालू माली साल मांय चीन, अमरीका अर यूरोपीय संघ ने पिछाड़ता थां सकल घरेलू उत्पाद-जी.डी.पी. मांय 6 दशमलव 3 फीसदी की बधोतरी सागे आगे बधण रा आसार हैं संयुक्त राष्ट्र संघ की ताजा रपट रे मुजब भारत रा घरारू खर्चा, मजबूत सरकारी निवेश अर दिसावर मांय सेवा देवण रा काम मांय बधोतरी रे कारण भारत की जी.डी.पी. मांय बधोतरी व्ही हैं

रपट रे मुजब जनवरी महीना मांय बधोतरी की रेट 6 दशमलव 6 फीसदी रा अनुमान मांय थोड़ो बदलाव व्हो है, पण आ हाल ई चीन, अमरीका अर यूरोपीय संघ सरीखी मोटी माली व्यवस्थावां ऊं अगाड़ी हैं

000

लोकसभा अध्यक्ष ओम बिरला आज वां रा संसदीय हलका कोटा-बूंदी मांय विकास रा केई कामां की सुरुआत कीनीं श्री बिरला ईटावा-खातौली हलका मांय 40 करोड़ रुपया रा विकास रा कामां की नींव रखी अर पूरा व्ह्या काम जनता ने सूंप्यां ई दौरान श्री बिरला वठे की जनता ने भरोसो दिरायो के हलका रा विकास मांय कोई कमी नी राखी जावेलां

.....

लोकसभा अध्यक्ष कोटा मांय चाल रह्या विकास रा कामां रो ई जायजो लीनों श्री बिरला सड़कां अर फुटपाथ की मरम्मत करण अर गैर-कानूनी कब्जा हटावण रा बारा मांय ई अहलकारां ने जरूरी हुकम दीनां

000

भरतपुर जिला की हथेनी ग्राम पंचायत मांय बर्तन बैंक योजना चलायी ज्यी हैं प्रदेश ने प्लास्टिक मुक्त बणावण की पहल रा तैत चलायी ज्या ई पायलट प्रोजेक्ट रे जरिये ब्याह अर दूजा मांगलिक कामां रे दौरान राख्या जावण वाळा जळसां मांय प्लास्टिक की ठौड़ स्टील रा बर्तन काम लेवण की अपील करी जा रही हैं बर्तन बैंक योजना रा जिला समन्वयक बतायो के पंचायत मांय राख्या जावण वाळा आयोजनां मांय काम लेवण सारू स्टील रा बर्तन किफायती रेट ऊं मुहैया कराया जावेलां

000

प्रदेश मांय केई ठौड़ां जोरदार गर्मी सागे लू बाजण लागी हैं बीकानेर, चूरू अर श्रीगंगानगर जिलां मांय पारो 45 डिग्री सेल्सियस ने पार कर ग्यों पिलानी, बाड़मेर, जैसलमेर अर फलौदी मांय अधिकतम तापमान 44 डिग्री सेल्सियस ऊं ऊंचो रह्यो घणखर ठौड़ां दिन की बगत तापमान 40 डिग्री सेल्सियस ऊं ऊंचो रिकॉर्ड कर्यो जा रह्यो हैं म्हाणा श्रीगंगानगर खबरनवीस बतायो के जिला मांय जोरदार गर्मी पड़ रही हैं

.....

मौसम विभाग बीकानेर अर श्रीगंगानगर मांय 20 मई तांई अधिकतम तापमान 45 ऊं 46 डिग्री सेल्सियस बीचे दर्ज व्हेवण रा आसार जताया हैं ई बीचे आज कोटा, झालावाड़, चित्तौड़गढ़ अर बांसवाड़ा समेत नौ जिलां मांय आंधी चालण अर बारिश सारू चेतायी ज्यो हैं आं जिलां मांय जोरदार बायरो बाजण रा आसार ई जतायी ज्यो हैं भरतपुर मांय दोपहरा पाछे आया तेज अंधड़ सागे हल्की बरसात व्हीं राजधानी जयपुर मांय बधती गर्मी ने ध्यान राखता थकां नगर निगमां री ओर ऊं खास चौराहां अर सड़कां माथे पाणी रो छिड़काव करायो जा रह्यो हैं ई सागे ई लाल लाईट सामी रुकण वाळां ने तावड़ा ऊं बचावण सारू हर्या शामियाना ताणी ज्यो हैं

000

राजस्थान लोक सेवा आयोग री ओर ऊं आज जनसंपर्क अधिकारी रा छह ओहदां माथे सीधी भर्ती सारू परीक्षा लीरीजीं दूजी कानी राजस्थान कर्मचारी चयन बोर्ड री ओर ऊं संविदा रा आधार ऊं लगाया जावण वाळा कनिष्ठ तकनीकी सहायकां री सीधी भर्ती परीक्षा-2024 काल ली जावेलां संवारे 10 ऊं दोपहरां पाछे एक बज्यां तांई जयपुर मांय ली जावण वाळी ई परीक्षा सारू 35 केन्द्र बणायी ज्यो हैं

000

विधानसभा अध्यक्ष वासुदेव देवनानी अर केन्द्रीय कृषि राज्य मंत्री भागीरथ चौधरी आज अजमेर नगर निगम रा नुवा भवन रो उद्घाटन कीनों ई मौके जल संसाधन मंत्री सुरेश सिंह रावत अर स्वायत्त शासन मंत्री झाबर सिंह खर्वा ई मौजूद रह्यां अजमेर नगर निगम रो नुवो भवन बणावण रा काम माथे करीब 30 करोड़ रुपया रो खर्चो आयो हैं

000